

宮
闈
典

宮闈典第一百二十三卷

宦寺部彙考三

明

太祖洪武元年諭宦官不得預政典兵 按大政紀洪武元年四月丙辰上謂侍臣曰吾觀史傳所書漢唐末世皆爲宦官敗蠹不可拯救未嘗不爲之惋歎此輩在人主之側日見親信小心勤勞如呂強張承業之徒豈得無之但開國承家小人勿用聖人之深戒其在宮禁止可使之供洒掃給使令傳命而已豈宜預政典兵漢唐之禍雖曰宦官之罪亦人主寵愛之使然向使宦官者不得典兵雖欲爲亂其可得乎

洪武二年命吏部定內侍諸司官制 按大政紀洪武二年八月己巳命吏部定內侍諸司官制諭之曰朕觀周禮所記未及百人後世至踰數千卒爲後患今雖未能復古亦當爲防微之計古時此輩所治止於酒漿醢醢司服守闈數事今朕亦不過以備使令非別有委任可斟酌其宜勿令過多又顧謂侍臣曰此輩自古以來求其善良千百中不一二見若用以爲耳目卽耳目蔽矣以爲心腹

卽心腹病矣馭之道但常戒勅使之畏法不可使之有功有功則驕恣畏法則檢束自不敢爲非也乃定置內史監奉御六十人尙寶一人尙冠七人尙衣十人尙佩九人尙禮八人尙樂七人紀事二人執膳四人司脯四人司香四人涓潔二人置尙酒尙醋尙麵尙染四局設正一人副二人置御馬御用二司設正一人副二人內府庫設大使一人副使二人內倉監設令一人丞二人及置東宮典璽典翰典膳典服典樂典乘共六局局設局郎一人丞一人又置門官午門東華門西華門元武門奉天門左右順門左右紅門皇宮門坤寧門宮左門宮右門各設正一人東宮門宮春和門東宮後門宮左門宮右門各設門正一人按春明夢餘錄中官之制凡內使小大者烏木牌平巾者不得衣員領束帶唯請轎長隨并都知監長隨各獅子等補束角帶及有牙牌官帽便謂之奉御正六品得服麟補束金廂璫珥或犀帶自奉御而上左右監丞五品左右少監從四品太監正四品太監而上方服斗牛補再陞則膝襴飛魚斗牛及蟒衣再陞方賜玉帶冬則光素夏則玲瓏三九月則頂收再陞則內府騎馬凡騎馬者自東西下馬門起至南內西上南門起至寶鈔司凡遇聖節正旦大婚誕慶各進馬一匹再陞則每歲祿米十二石後加一級皆益十二石

洪武三年重定內使服飾之制 按續文獻通考洪武三年十月上諭宰臣凡內使監未有職名者當別置衣帽以別監官禮部定擬內使監官凡遇朝會照依品級具朝服公服行禮其常服葵花背團領衫不拘顏色烏紗帽犀角帶其內使無品從者常服團領衫無背花不拘顏色烏角束帶烏紗帽垂軟帶年十五以下者惟帶烏紗小頂帽從之

洪武四年正月定宦官月支廩米閏三月命吏部定內監等官品秩 按大政紀洪武四年春正月

乙巳詔宦官月支廩米一石閏三月甲子命吏部定內監等官品秩自監令正五品以下至從七品有差上謂侍臣曰古之宦豎不過司晨昏供役使而已自漢鄧太后以女主稱制不接公卿乃以閹人爲常侍小黃門通命自此以來權傾人主及其爲患如城狐社鼠不可以去朕謂此輩但當服事宮禁豈可假以權勢縱其狂亂吾所以防之極嚴但犯法者必斥之不令在左右戒履霜堅冰之意也 按春明夢餘錄內官監通掌內史名籍總督各職凡差遣及缺員具名奏請設令一人正六

品丞二人從六品典簿一人正九品所掌文籍以通書算小內史爲之神宮監掌太廟祭器及祭祀灑掃設令一人正七品丞一人從七品奉御一人正八品尚寶監掌御寶圖書凡用御寶則奏請然

後付尙寶司官用之畢則捧入設令一人正七品丞一人從七品尙衣監掌御用冠冕衣服靴履設令一人正七品丞一人從七品奉御四人正八品尙膳監掌御膳設令一人正七品丞一人從七品司設監掌御用儀仗輦輅輿帳褥張設令一人正七品丞一人從七品奉御四人正八品司禮監掌宮庭禮儀凡正旦冬至節等命婦朝賀等禮則掌其班位儀注及糾察內官人員違犯禮法者設令一人正七品丞一人從七品直殿監掌各殿灑掃陳設設令一人正七品丞四人從七品小內史一十五人宮門承制掌傳奉宣召設奉御五人正八品宮門守門官掌宮門灑掃時其開闔稽察出入設門正一人正八品副四人從八品內承運庫掌供御金銀段匹等物設大使一人正九品副使一人從九品司鑰庫掌皇城各門管鑰大使一人正九品副使四人從九品巾帽局掌造內府冠帽設大使一人正九品副使二人從九品針工局掌造內府衣服設大使一人正九品副使一人從九品織染局掌織染段匹設大使一人正九品副使一人從九品顏料局掌燒造銀硃等項顏料設大使一人正九品司苑局掌種蒔蔬果設大使一人正九品司牧局掌牧養孳牲設大使一人正九品皆於內官內選用外承運庫掌收金銀段匹等物甲字庫掌收銅錢布匹顏料乙字庫掌收衣服

衾帳紙劄等物丙字庫掌收紬絲綿紗線丁字庫掌收銅鐵錫香茶蠟諸物戊字庫掌收氈衫胡椒并支軍器廣源庫掌收貯寶鈔廣惠庫掌收支寶鈔每庫設大使一人正九品副使一人從九品皆於流官內選用隸戶部皮作局掌硝皮熟皮張成造靴鞋鞍轡兵仗局掌造各項軍器寶源局掌鼓鑄銅器每局設大使一人正九品副使一人從九品皆於流官內選用隸工部 按酌中志內府十二監曰司禮曰御用曰內官曰御馬曰司設曰尙寶曰神宮曰尙膳曰尙衣曰印綬曰直殿曰都知四司曰惜薪曰寶鈔曰鐘鼓曰混堂又八局曰兵仗曰巾帽曰針工曰織染曰酒醋麵曰司苑曰浣衣曰銀作已上總謂之曰二十四衙門也此外有內府供用庫內承運庫司鑰庫等處亦臚列於後以備考焉

司禮監

掌印太監一員秉筆隨堂太監八九員或四五員設有象牙小牌一面長寸餘每日申時交接輪流該正凡每日奏文書自御筆親批數本外皆衆太監分批遵照閣中票來字樣用硃筆楷書批之間有偏傍偶誤者亦不妨略爲改正最有寵者一人以秉筆兼掌東廠掌印秩尊視元輔東廠權重視

總憲兼次輔其次秉筆隨堂如衆輔焉皆穿貼裏先斗牛次陞坐蟒先內府騎馬次陞橙杌祿米每陞一級則歲加米十二石各家私臣曰掌家職掌一家之事曰管家辦理食物出納銀兩曰上房執掌箱櫃鎖鑰曰掌班領班鈐束兩班答應官人曰司房打發批文書牘寫應奏文書其下則管帽管衣靴茶廚房打聽官看莊宅各瑣屑事務也其餘大小衙門遇有應題奏事情皆關白司禮掌印秉筆隨堂而始行凡御前親近大內臣曰乾清宮管事曰打卯牌子其秩亦榮貴猶外之勳爵戚臣也然皆得掌各衙門之印視其寵眷厚薄而欽傳畀之不拘資次 司禮監提督一員秩在監官之

上於本衙門居住職掌古書籍名畫冊葉手卷筆硯墨綾紗絹布紙劄各有庫貯之選監工之老成勤敏者掌其鎖鑰所屬掌司四員或六七員佐理之并內書堂亦屬之又經廠掌司四員或六七員在經廠居住只管一應經書印板及印成書籍佛藏道藏番藏皆佐理之自提督之下則監官典簿十餘員提督皇史宬并新房候轉提督俱輪流該正在廊下家宿專理皇城一應禮儀刑名鈐束長隨當差聽事各役關防門禁至逆賢擅政時令與文書房輪挨遇雙月十六日前往教場比試武職應襲其次六科廊掌司六員或八員分東西兩房管精微科內外章疏及內官脚色履歷職名月報

逃亡事故數目其次人數十員或八員管二十四衙門山陵等處內官職級姓名撰寫每日傳行聖旨稽查門禁鈴束當差聽事題奏應行禮儀應頒賞賜其次六科廊謄黃寫字一員其次管賞寫字則按節令挨次題稟禮儀文書及賞例或百餘員或數十員分兩班四撥各撥若干人其班按十二支輪之曰頭頂整一日過夜曰守早從卯至申曰守晚從申至次日天明曰末頂整一日過夜方得下班歇息四日也凡遇聖駕朝講遊幸穿麟補紅襖襖或青襖襖執籐條攔擋者皆掌司人數寫字也凡轉經廠司禮監掌司者則每撥內另有一種衙門寫字共十餘員挨補而已自提督至寫字俱穿襖襖凡出入皇城各門俱門軍接與擋道自內書堂奉旨撥派者曰正途其次或乞恩奏保改陞者亞焉 文書房官八員或十員雖穿襖襖其實祖宗初設原是遴選二十四衙門山陵等處有學行才識者委用職掌通政使司每日封進本章并會極門京官所上封本及在內各衙門本天下各藩府本府有大小濃淡之不同文書房各以名銜前後分管之其在外之閣票在內之答票一應旨意聖諭御札俱由文書房落底簿發行所以如今凡掌司陞轉文書房者槩削去司禮監銜都借列內官監銜其呈稟文書具見經手次第

禮儀房

提督太監一員掌印或秉筆擢之掌司數員寫字管事數員本房長隨數員掌管一應選婚吉禮每年春夏秋冬四仲月選乳婦生男十口生女十口月給食料在嬪子府居住凡宮中有喜鋪月子房則生男生女各一二口在文華殿外西北臨河之小房住及報生皇子則用生女嬪口皇女則用生男嬪口彌月剪髮百日命名及請髮留髮入囊冊立冊封選妃打扒角選駙馬一應禮儀皆經理之中書房

掌房官一員散官十餘員係司禮監監工年老資深者挨轉專管文華殿中書所寫書籍對聯扇柄等件承旨發寫完日奏進御前凡官中糊飾如不放外匠便只是監工并學手藝牌子糊飾挨轉此處并御前作至貧老無倚則發外經廠看守以待斃焉凡司禮監掌印秉筆隨堂故後各有牌位送外廠供安各有影像送西直闕外大佛寺供安看廠監工守寺僧人侍香火不絕也

御前作

掌作官一員散官十餘員亦是監工年老資深者挨轉專管營造龍牀龍卓箱櫃之類合用漆布桐

油銀硃等物料奏准於甲丁等庫關支已上二處亦掌印或秉筆提督之

內官監

掌印太監一員其下有總理管理僉書典簿掌司人數寫字監工分三班每班掌司第一人曰掌案所管十作曰木作石作瓦作搭材作土作東行西行油漆作婚禮作火藥作并米鹽庫營造庫皇壇庫裏冰窖金海等處凡國家營建之事董其役凡御前所用銅錫木鐵之器日取給焉外廠甚多有提督掌廠等官真定府設有抽印木植管理太監一員則內官監之外差也四年一換只有本監公文無勅書關防凡外方修建分封藩王府第亦是管理外差領勅書關防前去工竣卽回凡大行帝后陵寢妃嬪皇子女薨逝修造墳塋及完婚修理府第皆其職掌

御用監

掌印太監一員裏外監把總二員猶總理焉有典簿掌司寫字監工凡御前所用圍屏擺設器具皆取辦焉有佛作等作凡御前安設硬木牀棹櫃閣及象牙花梨白紫檀烏木鸛鵲木雙陸棋子骨牌梳櫳螺甸槩匣扇柄等件皆造辦之仁智殿有掌殿監工一員掌管武英殿中書承旨所寫書籍畫

扇奏進御前亦猶中書房之於文華殿中書也

司設監

掌印太監一員有總理僉書等官如內官監而所職掌者鹵簿儀仗圍幕褥墊各宮冬夏簾涼蓆帳幔雨袱子雨頂子大傘之類事最煩苦遠不逮御用內官監有贏餘肥潤也如遇御前打點庫藏檯箱則此三衙門之人皆任重不敢憚勞

御馬監

掌印太監一員有監督提督四衙營勇士小廝有監官有典簿掌司寫字拏馬等官有象房掌房等官子母象共九隻缺則奏於外象房改補金鞍作長隨房等處有各灘監工本監象房之東有裏草攔草場皇城之外有天師庵草場舊都府草場

神宮監

掌印太監一員司禮監監官或文書房無力者陞之有僉書掌司十餘員在端門之左九廟在焉四孟之朔聖駕親享之正旦節及別朔或遇日食則改卜於初五前後行其餘節令祀事唯謹卽外太

廟也

尙膳監

掌印太監一員光祿寺西門提督太監一員西華門內裏監總理一員管理僉書掌司數十員寫字監工及外牛房羊房等廠監工共百餘員而擡供養官撥子長隨各數十員光祿寺涼樓醬房逢七等項各有監工坐家名色職掌造辦每日早午晚奉先殿供養膳品乾清宮等宮一號殿仁壽宮等宮眷月分廚料各有差等凡在御前掌印秉筆管事牌子暖殿近侍及外之內閣文華武英殿中書畫士棹兒銀兩咸光祿寺職掌用典簿關防緘封每月酒飯一棹折銀十兩有奇半棹者五兩有奇到每月晦照欽賞數目坐名頒給之光祿寺志可考也

尙寶監

掌印太監一員僉書等官可數十員職掌御用寶璽勅符將軍印信其所知者尙寶司凡所領寶璽曰皇帝奉天之寶郊天齋醮用之曰尊親之寶上尊號用之曰親親之寶有大小二顆與藩府用之曰誥命之寶勅命之寶廣運之寶則用之最多也曰御前之寶則宮中庫藏箱鎖用之曰御藥謹

封則御藥房用之凡勅命遠去者仍用一黃紙封套上下悉用一寶封識之其文曰丹符出驗四方凡寶皆內尚寶女官掌之遇用寶則尚寶司以揭帖赴尚寶監尚寶監請旨然後赴內司領取歲用寶三萬餘顆歲用寶色銀六十餘兩工部虞衡司辦進別項供億不盡載也其餘寶璽尚多不恆用

印綬監

掌印太監一員僉書掌司數十員職掌古今通集庫并鐵券誥勅貼黃印信圖書勘合符驗信符諸事及南京解到文武誥軸凡追奪誥命交納本監會同該科給事中中書舍人於勘合底簿內附寫爲事緣由類於本監後小門之西傍河牆焚化

直殿監

掌印太監一員僉書等官數十員職掌皇極中極建極武英文華殿庭樓閣廊廡洒掃之役最勞苦冷局無大廳公署也

尙衣監

掌印太監一員管理僉書掌司監工數十員掌造御用冠冕袍服履舄靴襪之事兵仗局之南舊監

庫之北卽本監裁縫匠役成造御服之袍房也又名曰西直房凡造上用袍服之裏合用杭細等絹例具尺寸數目於掌東廠太監處取辦之

都知監

掌印太監一員不甚顯貴餘者皆本監寫字長隨各有青紅執事衣服凡聖駕出朝謁廟等項在前警蹕清御者卽此監之官也手執骨朶身穿鸚哥等補子戴平巾或官帽亦有穿圓領襖襖者其人極寒苦難以陞轉下下衙門也

惜薪司

掌印太監一員總理數十員僉書掌道掌司寫字監工數十員各外廠又數十員專管宮中所用柴炭及二十四衙門山陵等處內官柴炭每月初四十四二十四日開元武等門放夫匠打掃淨車及擡運堆積糞壤每歲春暖開長庚門率夫役淘浚宮中溝渠正旦節安彩粧凡遇冬寒宮中各銅缸木桶該內官監添水奏安鐵筭其中每日添炭勿令火缺以防冰凍備天災候春融則止皆惜薪司事也凡隆德等殿修建齋醮焚化之際用楊木長柴宮中膳房用馬口柴內宮關領則片柴也外有

北廠南廠西廠新西新南等處各有掌廠僉書監工貯收柴炭以聽關支

鐘鼓司

掌印太監一員僉書數十員司房學藝官二百餘員掌管出朝鐘鼓凡聖駕朝聖母回及萬壽聖節冬至年節陞殿回皆在前作樂迎導宮中陞座承應凡每年九月登高聖駕幸萬歲山端午闕龍舟插柳歲暮宮中驅儼及日月食救護打鼓皆本司職掌西內秋收之時有打稻之戲駕幸旋磨臺無逸殿等處鐘鼓司扮農夫飯婦及田畯官吏徵租交納詞訟等事內官監等衙門伺候合用器具亦祖宗使知稼穡艱難之美意也

寶鈔司

掌印太監一員管理僉書十餘員掌司監工數十員每年工部商人辦納稻草石灰木柴若干萬斤又香油四十五斤以爲膏車軸之用抄造草紙豎不足二尺闊不足三尺各用廉抄成一張卽以獨輪小車運赴平地曬乾類總入庫每歲進宮中備宮人使用至於聖駕所用草紙則係內官監紙房抄造淡黃色綿軟細厚進交管淨近侍收非此司造也

混堂司

掌印太監一員僉書監工數員職司沐浴堂子惜薪司月給柴薪內官監撥有夫役

銀作局

掌印太監一員管理僉書數員寫字監工數十員專管造金銀鐸針枝箇桃杖金銀錢金銀豆葉等豆者圓珠重一錢或三五分不等豆葉則方片其重亦如豆不拘以備欽賞之用又造花銀每錠十兩不等止可八成許又祖宗舊制有票兒銀者重十兩五兩三兩二兩一兩至一錢之方塊也其成色止有六七成上有分兩印字

浣衣局

掌印太監一員僉書等數十員唯此署不在皇城內在德勝門迤西俗所稱漿家房者是也凡宮人年老及有罪退廢者發此局居住內官監例有供給米鹽

兵仗局

掌印太監一員管理僉事十餘員軍器庫提督一員掌關防掌司一員掌司寫字監工數十員職掌

成造刀鎗劍戟鞭斧盛甲弓矢各樣大小神器又火藥局一處屬之宮中元宵上鼇山頂上之燈例點放神器三位則監工書也凡每年七夕宮中乞巧小針并御前鐵鎖鑰鏈鉗針剪之類及日月食救護鑼鼓響器宮中做法事鐘鼓鐃鈸法器皆隸之是以亦稱爲小御用監也

巾帽局

掌印太監一員管理僉書掌司監工數十員職掌內官長隨內使小火者平巾官帽每年入夏據見在員數具題移文工部至冬初卽於節慎庫領銀十餘萬兩鑿散內官內使人等靴料凡有羨餘繳進御前凡新陞秉筆卽送朝衣冠笏帶鞋一分凡選中駙馬冠靴中使閹者帽插柳跑馬勇士圓帽藩王之國旗尉靴帽若干分皆本局造送奏於工部支領工價

針工局

掌印太監一員餘與巾帽局同職掌內官長隨內使小火者冬夏衣每年遞散一次遇辰年戌年各散鋪蓋一次凡宮中做法事揚幡棹圍等件皆隸焉凡內官曾賜蟒衣退出宮及病故者各具本交還本局收也